

Održane konsultacije sa mladima u okviru platforme „Dijalog za mlade“ u Gradu Prijedor

U petak, 07. jula 2023. godine sa početkom u 11:00h u prostorijama Razvojne Agencije grada Prijedora „PREDA“, održane su druge konsultacije sa mladima u okviru platforme „Dijalog za mlade“ koje se sprovode u sklopu Regionalnog programa lokalne demokratije na Zapadnom Balkanu koji je finansiran od Evropske unije (EU) a implementiran od strane Razvojnog programa Ujedinjenih nacija (UNDP).

Dijalogu su prisustvovali mladi, aktivisti, srednjoškolci i predstavnici organizacija civilnog društva koje se bave pitanjima mladih, kao i predstavnici Grada Prijedor. Nakon uvodnih napomena, predstavljanja projekta, ideje i koncepta dijaloga te osvrta na zaključke prvih konsultacija, održanih u julu mjesecu 2022. godine, formirane su dvije grupe mladih. Svaka grupa je inicirala prijedloge koje bi se u formi projekata mogle realizovati, a koje utiču na aktivno uključivanje mladih u zajednici, podstiču volonterizam i aktivizam.

Nakon grupnih diskusija, svaka grupa je predstavila prijedloge. Prijedlozi su sljedeći:

- Provođenje akcija recikliranja i skupljanje PVC otpada u školama te usmjeravanja sredstava prema socijalno ugroženim porodicama,
- Formiranje đачkog/studentskog biroa - evidencija sezonskih poslova, volonterskih akcija koje odgovaraju mladim uz evidenciju (bazu) mladih sa interesima, vještinama za određene poslove,
- Revitalizacija terena Napoli - teren za mali fudbal,
- Uređenje područja uz Sanu - bazen i prateći objekat,
- Centar za rad sa djecom sa autizmom - projekat upošljavanja defektologa i
- Projekat podizanje svijesti o mentalnom i fizičkom zdravlju - angažman stručnih osoba za predavanja o značaju mentalnog i fizičkog zdravlja, prijedlog aktivnosti za uključivanje mladih u zajedničke aktivnosti od interesa za mlade: radionice crtanja, kreativnog izražavanja, umjetničkog izražavanja u širem smislu.

Pored ovih prijedloga, u okviru plenarne diskusije, mladi su podijelili svoja iskustva iz drugih projekata te predložili inicijative - uključivanje mladih u aktivnosti koje provode sve omladinske organizacije u gradu Prijedoru (npr. dan čišćenje i reciklaže, dan za kulturno umjetnički sadržaj, sportsko takmičenje, potraga za blagom, kulturno istorijska baština grada, uređenje grada...). Mladi su potaknuti da razmišljaju o provedbi aktivnosti u širem području grada, ne nužno sa fokusom na uže jezgro grada, već npr. Ljubija, Kozara i sl.

U narednom periodu će biti organizovan novi ciklus konsultacija sa mladima u okviru platforme „Dijalog za mlade“ sa namjerom da se u proces identifikacije prijedloga konkretnih inicijativa uključi veći broj mladih osoba sa područja grada Prijedora, te gore navedeni prijedlozi konkretizuju i obogate sa prijedlogom aktivnosti.

Nakon obavljenih nekoliko konsultativnih sastanaka sa mladima, projekat će, uz podršku Grada Prijedor, podržati jednu omladinsku organizaciju za podršku projektu za finansiranje i sprovedbu one inicijative koje su prioritizirane u okviru konsultacija, te one za koje procijene da će moći ohrabriti i angažovati mlade za učešće u životu lokalne zajednice.

Dijalog za mlade je konsultativni mehanizam za uključivanje mladih u život zajednice. Organizuje se u okviru Regionalnog programa lokalne demokratije na Zapadnom Balkanu 2 – ReLOaD2, kojeg finansira Evropska unija, a sprovodi Razvojni program Ujedinjenih nacija u Bosni i Hercegovini (UNDP) u partnerstvu sa Gradom Prijedor.

